

兩
當
軒
全
集

兩當軒集卷第三

武進黃景仁著

古近體詩八十一首

石鄉道中舟泛

好是日斜候吟詩上野航過橋人語聚繞水磬聲涼小飲
魚蝦市新寒薜荔裳棲遲聊自慰風景似吾鄉

寒夜檢邵叔山師遺筆因憶別時距今真三載爲
千秋矣不覺悲感俱集

三年誰與其心喪舊物摩挲淚幾行夜冷有風開絳幄水
深無夢到塵梁殘煤半落加餐字細楷曾傳養病方料得
夜臺聞太息此時憶我定徬徨

微病簡諸故人

連晨泥飲已千場觸忤文園舊渴腸燈下故衫交酒淚風
前羸骨戰冰霜苦吟未必因吟瘦畱病真成養病方自我
體中原小惡不妨過從話繩牀

二十三夜偕稚存廣心杏莊飲大醉作歌

安得長江變春酒使我生死相依之不然亦遣青天作平
地醉踏不用長鯨騎夜夢仙人手提綠玉杖招我飲我流
霞卮一揮墮醒在枕席神清骨輕氣作絲日來不免走地
上齷齪俯仰同羈雌寒陰噤戶不能出幸有數子來招攜
迅猋騰我沙拍面此際爛醉真相宜旗亭鬪飲西達子萬
斛瀉盡紅玻璃孟公肯顧尙書約李白笑殺襄陽兒出門

霜華被四野步入黑樾隨高低須臾荒荒上殘月照見怪
木啼飢鴟徘徊坐臥北邙地欲覓鬼唱秋墳詩東方漸白
寺鐘響遠林一髮高天垂下窮重泉上碧落人閒此樂誰
當知此時獨立忽大笑正似夢裏一吸瓊漿時

蔣二良卿齋頭掘地得桐棺丈餘發之乃古宮嬪
妝顏色尙如生也作詩記之且調良卿

玉顏黯黯閉蒼苔鈿合珠襦冷劫灰應是深宮人未識含
情今日待君開

通靈青鳥去誰家陵谷推移事可嗟妒爾夜深庭院裏十
年吟斷玉勾斜

新月

開簾延暝色涼月已如鉤頓使碧天遠平含萬古愁
林外寺薄霧水西樓悵好幽人夢依依不可留

一笑

一笑加餐飯如予無事貧蹉跎養親日珍重著書身
雲影睡中過山容雪後真小籬梅放未筇屐趁茲辰

題曉山上人畫幅

去冬泊舟豫章西山羨其林壑之美今見此幅風景絕似雲

林二語當時所得茲足成之卽題其幅

夙昔烟霞意最親披圖忽忽感前塵
雲林如此真幽絕可有讀書長嘯人

和吳二江帆贈詩

一觴一詠話綢繆樂事都忘歲月遒
故國有情逢挾纊時

羊裘見贈天涯從此倦登樓
投詩美備色香味去俗遠於風
馬牛昨夜朗吟渾未寐
草堂風雪看吳鉤

殘月

殘月缺半規
窈然碧虛色
臨茲芳譙空
坐增華序惜
鏡掩漢宮秋
花飛洛城夕
停觴一徘徊
終古愁不得
亮無媧皇石
誰鍊陰精魄

夜坐書懷

一身萬事付闌珊
不信真愁門戶難
此地更無雞肋棄
前途憑仗馬蹄攢
夢回細雪關城迴
歲盡窮陰海國寒
今夜燈前兒女意
依依猶似慰眠餐

游艤舟亭

确碑石穿屨蕭疏樹礙眉已添新長竹不辨舊題詩佳日
虛高會前游引夢思憑欄好風至美滿爲誰私

歲暮篇

歲暮無一就嗒然臥深巷面長愧乞米心枯乏藏釀十日
不出門萬景厲邁狀瘦鬼驅蒲鞭豪奴走華餉更聞井里
喧索逋百不讓兒童喜并躍衰盡感彫喪同時各殊情觸
目引惆悵大雪人盡餓此時信微尙敢喜無事貧所媿有
親養重以歲時感門戶子無傍牢憂奚所成逃情託蕭曠
籬梅鍊幽容溪波縮寒漲空庭有雙柏棲森屹相向宵雪
助淒其晨風作悲壯倉颉困多徙簷雀飢難颺撫景一沈
思萬事且遺忘知交半星零天末各相望興至無可乘誰

來剡溪訪索居信少歡清修庶爲暢俯仰柴門中金石發
孤唱寄謝流光催閒身許無恙

人日病愈強步觀城西水上合樂

豆稽灰抹春雲色野人新病足無力聞道城西盛水嬉緩
步輕塵懶不得沙棠之舟木蘭楫絲歌陣中刺舟入三搖
兩兀意已輕萬翠千朱望疑合粉妝照水愁水渾病面照
水愁水清水清水渾不相入眼前士女空傾城閒情自分
沾泥絮一笑還踏疏林路穆然一角見遙山無人知是春
來處

飲洪稚存齋次韻

綠酒紅燈款語深等閒身世任浮沈花前幸是相逢好竹

下還尋舊地吟小草經時成遠志青楓異日損春心應知
此去淮南客舊雨拋離怨不禁

後一日復飲旗亭再用前韻

皓魄將殘夕露沈離堂燭盡悄愁深羣公試賭黃河唱有
客曾爲楚澤吟去鳥悠悠隨落日長川淼淼引孤心隴雲
朔雁分飛急雙淚君前自不禁

春日獨居得閔二季心近狀卻寄一首

我胡不樂憂心擣春風別離春日好一髮吳山對眼青相
思此日教人老十年以來朋舊稀失意風雲狎魚鳥濟南
公子才抱親客邸聯盟亦草草飄零契闊固其理朝夕陰
晴不相保當年對酒邗上城一夕聽斷蝦蟇更高歌擊筑

一揮灑感激意氣真幽并南枝北風竟相失白日清江傷
我情昨日有客涕上至問訊得悉愁屏營嗟哉夫子尙淪
落賤子不復言生平但道別來無幾日至今如夢不曾醒

別老母

攀幃拜母河梁去白髮愁看淚眼枯慘慘柴門風雪夜此
時有子不如無

別內

幾回契闊喜生還人老淒風苦雨閒今夜別君無一語但
看堂上有衰顏

幼女

汝父年來實尠歡牽衣故作別離難此行不是長安客莫

向浮雲直北看

老僕

飄零應識主人心
仗爾鋤園守故林
數載相隨今舍去
江湖從此斷鄉音

和杏莊贈別

我生篤求友識子非等閒
晤語不幾日別路愁閒
關屈指共征序冬乾變春
繁逝水不顧反縱蹄難復
閑學爲桃柳浮遂老瀕洞
閒崇坂一何厲盤盤上青天
畏途閱孔多隨矚擲且軒
有客歌慷慨贈我金石篇
所慰匪餐飽閤勛惟省愆
在迷甫戚戚當悟方卓然
敢請今日始奉此相周旋
行矣不可畱日暮天且寒

送姜貽績北上

橋李城邊路相逢對榻吟一身湖海氣萬里風雲心賦橐
長楊筆題畱漢上襟無端又明發煙浦悄然深

嘉禾畱別鄭七藥圃

十日春波短棹停三年重過草元亭風塵我愧無雙譽家
世君傳有一經陌路久看人眼白夜窗今共客燈青酒醒
莫問明朝事門外驪歌不可聽

十四夜京口舟次送別張大歸揚州

談經說劒氣縱橫畫舫銀燈黯別情春水將生君速去此
江東下我西行蕪城鶴送三更唳京口潮添五夜聲後夜
相思同皓月君家偏占二分明

二道口舟次夜起

覆浦輕雲薄似紗
暗潮汨汨蕩舟斜
舟雖暫繫仍爲客
夢爲無聊懶到家
五夜驚風眠岸荻
一灘明月走江沙
微軀總被無田累
來往烟波閱歲華

舟夜寒甚排悶爲此

春江異風候今昔
變炎涼袍少故人
脫綿餘慈母裝寒
醒五更酒濃壓一
篷霜此際惟珍重
誰憐在異鄉

當塗旅夜遣懷

去年霜落白蘋洲
千山萬山木葉愁
布帆吹我遊潭州
今年春江鴨頭色
吳波不動楚天碧
辭家作客來采石
采石磯邊雪浪飛
謝公池畔春雲歸
江山如此葬李白
我若不

飲遭君嗤黃金欲盡花枝老鏡裏二毛空裊裊旅歌歌短
不能長月出女牆啼怪鳥

一笑

一笑陶然醉無聊失路人素心雲外月白眼道旁春認履
將毋錯懸蛇恐未真催詩且多料客計未全貧

春日和容甫

昔我之出矣春山噪寒禽東風一飄蕩春色竊以深今朝
眺原野烟景何沈沈繁葩曜初旭密樹參高岑絢爛亦云
極但覺意蕭森遵渚緬故逕攀條思舊林詎惜歲華促難
爲遊子心

送春三首

昔我初從江上至春風萬里隨帆檣多時水村見桃李一
雨沙渚生菰蔣比來掩閣青山旁主人壓醅喚客嘗生芹
苦筍日登饌暗覺節物辭青陽短歌不豪飲不狂風禽對
我當空翔

此身卑賤無一能矯吭但欲爲新聲淫哇韶濩世莫辨當
歌忽覺傷我情飛而食肉負骨相老饕大嚼聊爲生平原
十日醉未醒一朝辭我歸榛荆因茲對食每不御感恩七
尺鴻毛輕十年未知所死處盛時往矣悲填膺

朝遊滄海暮江漢余懷渺兮發浩嘆水深網斷珊瑚沈佩
去懷空彩雲散側聞天上朝星辰誰知人閒茹冰炭長夜
耿耿魂熒熒憂從中來那能斷燭龍收視若木摧何時得

見閬闔爛玉蚪高駕倘見招急叱羲輪出平旦

偕容甫登絳雪亭

汪生汪生適何來頭蓬氣結顏如灰囊無一錢買君醉聊
復與爾登高臺驚人鷹隼颺空去俯見長雲闐且開江流
匹練界遙碧風勁烟萋莽寒色危亭倒瞰勢逾迴平墟指
空望疑直憑高眺遠吾兩人心孤興極牢憂并自來登臨
感遊目況有磊砢難爲平麟麀雉鳳世莫別蕭蒿蕙茝誰
能名顛狂罵座日佗倅疇識名山屬吾輩著書充棟腹常
飢他年溝壑誰相貸一時歌哭天夢夢咫尺真愁鬼神會
汪生已矣不復言眼前有景休懷煎願從化作橫江鶴來
往天門采石閒

雜詩

謀懽知幾日戚戚復何爲交淺詎能怨情傾爲所知看山
宜石骨聽樹識風枝好斂長虹氣浮雲不滿吹

春暮呈容甫

先生吟太苦終日閉荆關我亦詩窮者邀君數往還對牀
聽夜雨分枕夢青山一任春江上流紅萬點殷

三十夜懷夢殊

削跡少歡思中宵影自娛勞生常鹿鹿卽事每烏烏到枕
江聲近聞鐘夜氣孤因懷舊遊伴猶憶故人無

尹范同衣日荆高縱酒場吟風推兩小立雪忝同堂

同在邵虞

山夫子門下

我病甘搖落君才更老蒼白頭期望意豈獨在文

章

和容甫

三五讀書策結懷嵇阮儔生身苦非時不得同遨遊橫几
覽禹貢靈產鬱九州邂逅豈不識索處誰相謀驅車涉伊
洛仗劒干王侯紛華敢馳慕邱垤不滿眸風禽愧短翮出
谷徒啁啾乃知天下士定在風塵收銜吁返征駕矯望立
路周長此求友心六合何悠悠

大雅久淪沒巍然見時英作述千載上死灰起芒精氣吐
相感激長揖如生平誰令黃鐘節掩以瓦釜鳴相樂反相
泣出涕何縱橫十千置斗酒不惜爲君傾高筵列華燭美
女調繁箏揮手不能顧悅耳非新聲藉無師涓奏何以移

我情

雲中見祥鳳百鳥無文章
炎洲產嘉桂百草爲不香
修辭富華實秉操逾主璋
翻使一國中撫掌嗤其狂
悲心入秋夜苑邑思飛揚
終朝逐塵鞅踈踈趨路旁
衆中獨我親亦知我心傷
兩小皆失怙哀樂頗相當
貧賤易爲感沉復齊孤芳
盛時忽晡冉逝矣摧肝腸

短歌

清江瀾瀾白石粲粲小星
熒熒大星爛爛豢龍不如
鱖蝦笈鳳不如鳬雁賤修
不如貴天飢聚不若飽散

曉發牛渚磯

短帆拂曉春江上鮮雲生
瀨波如掌一聲轉柁過蒼
巖驚

起白鷗飛兩兩三山已盡牛渚來巉崖三面排江開昔人
一矢鬪天險卽今無浪猶風雷我來捨舟登絕壁萬丈高
寒盪心魄水深不見燃犀人斷霞魚尾星星赤

太白墓

束髮讀君詩今來展君墓清風江上灑然來我欲因之寄
微慕嗚呼有才如君不免死我固知君死非死長星落地
三千年此是昆明劫灰耳高冠岌岌佩陸離縱橫擊劒胷
中奇陶鎔屈宋入大雅揮灑日月成瑰詞當時有君無著
處卽今遺躅猶相思醒時兀兀醉千首應是鴻濛借君手
乾坤無事入懷抱只有求仙與飲酒一生低首惟宣城墓
門正對青山青風流輝映今猶昔更有灞橋驢背客

賈島墓亦

側在此閒地下真可觀怪底江山總生色江山終古月明裏
醉魄沈沈呼不起錦袍畫舫寂無人隱隱歌聲繞江水殘
膏賸粉灑六合猶作人閒萬餘子與君同時杜拾遺窈石
卻在瀟湘湄我昔南行曾訪之衡雲慘慘通九疑卽論身
後歸骨地儼與詩境同分馳終嫌此老太憤激我所師者
非公誰人生百年要行樂一日千杯苦不足笑看樵牧語
斜陽死當埋我茲山麓

江上寄左二杏莊

江流日歸海客心常與東神遊越枝外目斷吳雲中激蕩
水石響淒晦草木風渺軀乏豐羽輾轉逐驚蓬一別西蠡
道五過館娃宮繁華不足悼逝景何怱怱幸有澗樓約還

悲川嶺重蕙榮倘不歇遲我春山空

適迴達長夜歡讌時耿耿層城匪迢越廣陌交馳騁揮觴
送白日流連逐光景修軒俯河梁落月度帆影剪燭未及
短別離甫在頃林猿嚮晨悲露鶴入宵警寸襟隔千里端
憂各延頸長此空中書淚下如縻縷

夜坐懷曹以南

回風飄飄捲庭綠南枝啼烏北枝續林深屋古蕭無人遊
子徬徨坐中宿我所思兮隔雲岑十年久斷瑤華音山中
見月倘相憶夜長漫漫惟素心

登翠螺山偕顧文子

茲山可遊無暇日三五今始同招攜草閒得路至絕壁天

半有風吹客衣六朝重鎮一巨石九派急溜當巉磯江山
我輩不相識好放硬筆懸崖題

憶徐遜齋滇南

黟山插天練水清此閒那得猶宦情送公江上拂衣去南
雲萬里天空青冉駝大酋從問字洱水老龍來聽經桑榆
萬事堪不朽坐令遠徼開文明我胡不樂梁園行昔時綵
筆今無靈落魄彌思受恩處此身只合隨鴻冥昨宵魂夢
到公側玉案山頭劒茯苓

對月詠懷

來時梅花點行驂桐陰萋翳今滿簷堂堂歲月背人駛對
此清夜能無慙讀書擊劒好身手野性束縛難爲堪文冠

越客古所歎監廚借面生未諳風前淒亮折楊曲夢中宛
轉隨湘帆豪吟狂賞不幾日豈意造化嗔吾貪飄蕭舞袖
動中宿惓惓酒悲生半酣後人笑我太寂寂我謝此固非
吾甘江山主人五湖長年命可待何容謙唾壺擊缺月落
去靜聽城鼓搗過三

十六夜

曳革尋吟萬綠中霏烟襲月共長空四圍冷合山嵐氣一
片腥吹草木風愛聽歸鴻催滅燭似聞宿鳥訴驚弓苦哦
動輒兼長夜燕蝠休爭口角雄

夜坐寫懷

白日長吁靜夜歌飛揚慷慨欲如何四休願只飽休足三

上吟偏枕上多相對無猜惟酒盞等閒難著是漁蓑作詩
辛苦誰傳此一卷空宵手自摩

夢孤山

昔慕林和靖平生亦愛梅遶廬三百樹一手親栽霜冷
月孤落山空我獨來耳邊猶鶴唳殘夢已飄回

書館卽事

驟雨颯然過天青薄陽出澹澹空牆陰暉暉遠林沒客序
侵朱明寒飈尙蕭瑟蕉心怯涼卷桐葉淨陰密草馨悅羈
魂水氣明暗室地偏闌無人長歌時抱膝俛仰變晨暮開
闔從書帙豈不懷飛騰倘來事難必

夜坐述懷呈思復

密篠崇蘭露氣昏
草堂促膝倒深樽
燈前各掩思親淚
地下偏多知己恩
似水才名難療渴
投閒芳序易消魂
滄洲散髮他年事
遲爾清江白石村

雜詩

衆煦欲漂山聚蟲亦成雷
寸心一猶豫不復全瑰奇行樂
居要津乃受前賢欺擾擾百年盡
歌鐘生暮哀緬哉蘇李
交閔勗當生離斯人不可作
俯仰使心悲
流俗徇耳食真賞難可遇
聞聲或相思日進反不御叩門
沉拙辭望氣已無豫
遂使懷奇人進退失所據
駿馬嘶交衢三日無一顧
歸來服鹽車努力待遲暮

舟中詠懷

桃花新漲碧無垠夢裏漁歌半隔津自笑出門無遠志五
湖三畝是歸人

寄王東田丈

丈人昔日真好奇步行荷戟隨征西隻身斫壘沙滾滾隨
手殺賊風淒淒功成乞身不受賞萬里攜得平戎詩功名
世上豈公意意氣平生真我師蘭陵城邊醉君酒落魄閒
蹤無不有半酣跨出五花驄顧盼依然射生手有時對客
脫衣舞肘後創瘢長尺許笑攜鐵笛作龍吟悶撥檀槽學
羌語感恩懷舊更欲獻老去雄心變悽苦昨夜西風斷玉
關傷心廣利未生還將軍殘客田疇在慟哭秋原落照閒
請纓昔詫從軍樂仗劍今歌行路難天青落落華不注飄

若浮雲且東去石田茆屋待公歸七十二君封禪處別去
音書阻大河夢中常見涕洟多南城恥逐博徒飲深夜還
遭醉尉呵我亦年時苦蕭瑟剩有空囊未投筆憂來更上
仲宣樓一劒期將知己酬逕欲短衣騎馬至風毛雨血北
岡頭

喜雨

飛雨江上至白雲飄滿楹風色亂庭綠羣鳥號歸聲初響
極輞輒末勢猶砭骨人意各斂愕土氣流炎腥須臾黑陰
過縷縷天開青長虹東嶺出雨腳西山明頓覺葛衣薄坐
對疏簾清快哉消積暑況乃愜農情

夜坐有懷

移席綠陰下修軒過雨餘風淒螢火定月潔柳烟疏對影
三人共思君半枕虛幽憂長抱膝良夜待何如

懷方仲介閩中

雨曜孰鞭叱盛時不我畱歡愛復乖阻撫景懷百憂魚書
滯越嶠桂楫淹吳洲夙負王貢約今阻羊何儔無諸建國
地幔亭仙樂稠長波撼鐵嶺急峽斷金牛臨眺信悅魄思
歸倘凝眸華聲蜚竹箭健賦凌丹邱蹉跎各垂翅霜雪漸
盈頭鶴唳關山夜風高禾黍秋相憶不相見倚柱發長謳

夜坐懷維衍桐巢

劒白燈青夕館幽深杯細倒月孤流看花如霧非關夜聽
樹當風只欲秋吳下酒徒猶罵座秦川公子尙登樓天涯

幾輩同飄泊起看晨星黯未收

江口阻風宿僧寺

遠山蒼蒼林木幽林深山暮行人愁燈光遠引得蕭寺如
倦鳥獲高枝投僧衣三兩性樸率畧詰居里邀相畱橫扉
置榻甫離地析薪熬粥不滿甌中宵輾轉終不適破櫺敗
籜風颼颼我行江上已半月掛帆欲往阻石尤今朝天氣
快晴美策蹇來看金陵秋無端失路此閒宿萬事眞怪非
人謀寺鐘漸歇曙鴉起草草盥漱還登樓對面正見鍾阜
樹來路卻背青溪頭依然攬衣出門去畱有餘戀勞回眸
日光到地至江口孤篷移待蘆花洲長年迎譟告風便登
舟火急開中流風聲耳後倏浩浩身世依舊魚龍浮

三月十六日

三月十六天晴和千帆爭溜齊唱歌中流忽然怒颿作天
吳駕浪陽侯波回檣一退五十里自采石至芝麻河陰雲
如掌倏布密恍惚濤頭走靈物舵樓屏息不敢言眼看前
舟後舟沒號呼未畢聲俱沈良久篷窗或浮出我舟著岸
如有神樓櫓漂裂人猶存須臾雨過天墨色事定清淚翻
沾巾嗟我何爲亦挺險脫有不測無此身轉笑適來呼吸
頃正襟危坐亦欺人

夏夜

闌風伏雨吹十日作此酷暑如蒸燂樹陰不肯動毫末月
出照面黃於金江城如斗江氣溼萬派濤聲靜中合夜深

雞犬寂無聞起舞悲歌繼之泣辜負薦肩火色人侯門襤
織百酸辛絕憶水雲空闊處夜涼垂釣蠡湖濱

梁山夜泊

寂寞溪山百戰經平沙無際暮雲停天門夜色莽搖動巫
峽江流歛杳冥戍重鳩茲通楚塞鎮嚴姑孰望新亭隔灘
蘆管休嗚咽恐有潛繆帶雨聽

偶成

破浪乘風萬里遊早時落魄更離憂邯鄲灑淚輕鄒季鄴
下蜚聲愧應劉白首知交貧好在朱門簫管暮偏愁臥龍
躍馬終黃土誰道狂歌非遠謀

苦暑行

火輪杲杲懸中天，鑠大地，生青烟。千章黝綠披且死，中有嘒嘒蟬聲，聯桃笙，畫展北窗裏。睡餘汗欲浮，身起平頭，搖扇不可得，拔劒驅蠅聊爾爾。頗聞亢旱江淮田，三日不雨，無今年老親病婦，饔牖底憂飢苦暑，誰相憐。明知一雨難遽得，安得將心作頑石。

後苦暑行

南飛黃雀翅倒垂，十日不得微風吹。豈惟涼飈不可得，萬里長空淨雲色。蟲蟲氣挾天如癡，卑溼年命何能支。分冰豪飲羨河朔，浮瓜雅會思南皮。閒居寂寂少顧盼，雙鬢蕭蕭積憂患。經茲數十無此身，澗飲巖棲夢皆幻。

喜新涼

經旬苦焦暑一雨快披襟萬綠烟生樹初絃月照琴當風
人意定移簾竹香深卽此新涼夜因知造物心

十一夜

依舊高齋月沈吟久不歸幽居惜光景病眼愛芳菲穿樹
流星疾當風去鳥稀遙知故山樹手植漸成圍

十六夜宴沈太平座卽呈同座諸子

清江月出管絃愁刺史華筵最上頭一串歌珠圓可拾幾
堆香霧漫難收天涯我輩同歡笑明日浮雲有去畱誰向
此時彈別曲一聲河滿淚先流

曉起

今朝風日好可以賦新詩候早秋先覺涼多夜漸遲開幃

納蕭爽隨意檢琴后長想北山下看雲倚杖藜

十八夜復宴

溼翠千嵐拍座浮座中楚舞雜吳謳非無山鳥驚歌板不
用花枝當酒籌曉色遠沈牛渚月江聲冷送秣陵秋休悲
飲罷無歸處身世猶餘一葉舟

立秋後二日

倦客思秋秋苦悲薄羅幾日卷涼颺魚龍故國西風夜爪
果深閨落月時老馬識途添病骨窮猿投樹擇深枝傷心
畧似萋萋草霜霰將來爾未知

夜起

缺月黝將盡遠掛寒林色照此五夜心淒涼亦云極崇蘭

愁素辰幽壁啼破壁星河淡思曙風露淒猶夕永嘆達鐘
鳴褰衣竟何適

秋思

連宵洗車雨蕭蕭響梧楸對此半城綠已經三日秋園葵
烹鴨腳水芡剝雞頭多少鄉關思輸人一葉舟

七夕懷容甫游采石

疏梧槭槭漏遲遲人去庭空獨立時羨爾萬峯高處望半
輪涼月下蛾眉

翹首千秋作賦才青山迢遞水潌洄夜深倘有橫江鶴好
訊山東李白來

兩當軒集卷第三

兩當軒集卷第四

武進黃景仁著

古近體詩七十九首

月下登太白樓和思復壁間見懷韻

白也高樓上切雲巉礧業業水粼粼先生去後爲長句海
內於今有故人我亦能來醉江月君從何處倚秋旻臨流
無限瑤華憶咫尺風波未可陳

金陵雜感

平淮初漲水如油鍾阜嵯峨倚上游花月卽今猶似夢江
山從古不宜秋烏啼舊內頭全白客到新亭淚已流那更
平生感華屋一時長慟過西州

康王廟夜宿

殿角叫鴟梟門前沸海潮淒淒五更轉隱隱百靈朝野曠
秋衾薄風寒宿酒消百年羈旅夜生事太無聊

中元僧舍

初見秋月圓臥病客心折經魚沸夜潮風馬戛簷鐵強步
臨前溪光景渺悽絕灑露樹頭明紅燈草根滅人鬼半天
涯悽魂斂商節辭家今半年感此涕如雪三嘆歸幽齋寒
蟬伴嗚咽

金陵待稚存不至適容甫招飲

去年人來白下時清秋襍被相追隨青溪溪頭一輪月照
爾日日添新詩偶然持論有岨嶬事後回首皆相思今年

秋比去年早今年月比去年好我來待君君不來問水尋
山都草草幸有汪子相過從慰我離索傾深鍾尊前話舊
半悲樂痛飲不覺酣西風聊將生別新知意吟入六朝煙
寺中

雨花臺

行盡長干道崇臺得壯觀秋天多雨勢江上更風寒王氣
全消歇山形尙鬱盤松楸彌望處寂寞葬千官

八月十六夜登景陽閣

內橋東去冶城西傑閣層峻望眼迷只欲化烟山黯黯每
於對月客悽悽半城簫管吹雲淨平野星河壓戍低節物
漸移燈火亂更無殘夢到金閨

對酒歌

倉倉皇皇壯士泣路旁欲上太行兮冰折轂乃浮滄溟兮

水浩浩其無梁

解一

有何神之君韋彼飛練縹旌流雲兮閃

騎爭電明明在前倏乃無見

解二

朝吁暮咤邪氣內陷肝腸

四摧匪有此七尺而誰之哀

解三

青天爲車日月爲輪載我

百年輾轉苦辛我欲摧之爲朝餐之薪

解四

糾兮結兮有氣如霓知不可久畱兮吐吐苦饑

解一

誰謂殤

子天彭咸爲壽驅車出郭門狐九尾蛇兩首啖人骨如飴

古人云死欲速朽

解二

渺慮八埏靈光四來我乃逐於物而

顏灰

解三

堯舜在上許由洗耳鳳凰不祥羽毛禍體

解四

乃云

少原之野閬風之邱有晦兼爲圃兮壘玉爲樓不見夫西

王母之戴勝穴處兮夫何有異樂之可求

五解

秋興

并序

昔潘黃門以三十二見二毛爲賦秋興余則二十
有三耳臨風攬鑒已復種種早凋如此其何以堪
且念人之以白頭蓋棺者十不得一而余已先見
此也有慨於懷率爾成詠藻詞莫託感均期一和
之云爾

羣植斂商氣壯士悲暮年華心一朝盡魂質無芳妍摧殘
積獨厚零落爭時先於物爲不祥於理有固然昔人抗遐
尚奮藻輝星躔觸寓感孤抱流哀彌八埏亮由悲年命三
歎撫遺篇盛時不可再千載同逝川

嚴飈一何疾勁草心不憂白髮本至公不上松期頭蓬壺
一水隔大藥知難求奈何處一世俯仰同纍囚未識生人
樂行將成土邱回風蕩四壁日影何翛翛恨隨孤蓬發思
逐纖塵流嗟余未聞道何能齊短修徵衰非一端淚下不
可收

偕稚存登鷄鳴山

前代游觀所離宮面面開草知盤馬地雲識放鷹臺城郭
叢花現江流匹練迴迴看孝陵樹懷古使心哀

旅夜

天高野曠肅孤清落木蕭蕭旅夢驚病馬依人同失路冷
蟬似我只吞聲荒城月出夜逾悄小閣燈殘水忽明一臥

滄江時節改深杯柏葉爲誰傾

稚存歸索家書

只有平安字因君一語傳馬頭無歷日好記雁來天

甫有

甫有談經約傳聞太不祥黯同秋草折永入夜臺長橫瑟
知無路回車合斷腸一篇傷友賦頭白爲江郎

擬銅雀妓

漳流望不極朝日耀飛螢腹曲綺疏結紛蘊繁技呈緘芳
各流媚三千同一情不知玉輦去猶作遏雲聲君恩竟何
許高臺猶未平塵將華吹歇月照繡帷明回首西陵樹惻
愴念平生

子夜歌

思君月正圓望望月仍缺多恐再圓時不是今宵月
萬里流沙遠眞愁見面難閨中無挾彈那得雁書看

金陵別邵大仲游

三千餘里五年遙兩地同爲斷梗飄縱有逢迎皆氣盡不
當離別亦魂消經過燕市仍吳市相送臯橋又板橋愁絕
馱鈴催去急白門烟柳晚蕭蕭

仲游行病甚

久別會方違言離病更兼勞生何日息白髮一時添玉骨
常思化金風早戒嚴前途好將護爲爾下車檐

九月白門遇伍三病甚恐其不可復治後聞其強

病相送而余已發矣因綜計吾二人聚散蹤跡作
爲是詩伍三見之當霍然也

伍郎束髮去鄉土挾彈翩翩十三五呼盧縱酒百不憂只
思射殺南山虎西冷橋畔與君逢投鞭一醉春風中吳姬
壓酒香滿店門外垂楊嘶玉驄是時方雨小意氣絕傾倒
一爲吳門別君訪安期崑十年滄海頭朱顏不自保嗟嗟
翔風翰墮作窮林鳥葛衣索索行市中雙鬢憂來似蓬葆
道逢南陽劉孝標慨然爲著廣絕交炎涼世態有如此我
輩豈肯長蓬蒿倏忽流光疾如電耿耿思君撫長劒扁舟
三度訪君門落花滿地無人見今秋意外得重逢誰知君
病餘危喘得志無身古所傷況今七尺猶貧賤我爲因人

更遠離望風遙別不勝悲聞君力疾猶相送想見重來惆
悵時

不寐

不寐憂心折支頤達夜闌神虛警微響屋古動蕭寒氣候
三秋盡羈孤一夢難明朝清鏡裏應有二毛看

客齋偶成

詎有飛鳴志何因賦自憐骨臞依檻鶴詩澀受塵絃虛壁
雲光動寒窗日色鮮艱難衣食候無計且高眠

新月

乍見是將落愁心不可論陰陰當鏡閣慘慘掛關門光弱
如新病天長有斷魂相看兩幽絕一角遠山痕

別顧文子之繁昌

楓林如醉雁成羣小疊行裝向夕曛詎有西江能潤我不
堪南浦又辭君分馳晏歲多殘客回首重城祇斷雲遲爾
春來官閣裏梅花消息早相聞

楚歌行

琳琳琅琅洞開金房鏗鏘鏘鏘中調絲簧主人將罷直歸
從承明軒旌曷來兮出門望堂前翹足珠履客窗中卷幃
紅袖色起視府中府中屏息忽傳收者將到門金爐香爇
酒正溫羣奴倉皇客引起來時浮雲去時水

陌頭行

妾心化遊絲牽歡古道邊明知牽不住無奈思纏綿

妾心化春草遮歡山水程明知遮不住到處得逢迎

湖陰

多時欲作湖陰行此日湖陰行始果天寒歲晚野不暉日
暮途窮馬時墮似聞人語不見人轉過林梢見燈火是時
人畜同時飢入村沽酒村民疑比鄰環集叩來路話久方
知宿程誤官嚴不敢畱生客更欲披星向前去我告村翁
容小畱忍待月出東山頭

將至蕪湖憶文子容甫

向曉離亭舉客杯青山一路送人來際天無樹知江近極
浦有帆和雨開弔古空灘餘戰艦悲秋斜日上層臺故人
回首重城外爲報離腸已九迴

客夜憶城東舊遊寄懷左二

人生百年如過客那得歡遊不回憶眼看胡粵皆殊鄉那
得知己常對牀我念城東好風月同遊左子復清發被酒
每逐殘星歸哦詩動及晨鐘歇君家屋後林麓美佛院陰
森隔烟水時攜鐵杖來叩門驚起山僧及童子醉騎長松
叱欲飛片片秋雲墮如紙雲階月地杳莫攀卽今惟有夢
中還樓頭書劒飄零日曲裏家山悵望閒始知聚散枝頭
烏有限歡娛不常保羨君色笑承親幃樂事天倫無一少
我行日夜江之濱素衣緇盡心生塵山川風景總堪賦偏
覺故園邱壑眞遙知文酒足清讌可念同遊漂泊人

春穀道中

朔風吹客度長林浩蕩川原雪氣陰一澗紅花澗名寒漸冽
雙峯隱玉峯名晚蕭森人因地瘠多飢色鳥爲天空有去心
日暮那堪途更遠馬嘶猶似助悲吟

山寺偶題

得得千山引去程精藍小住一牽情十年懷刺侯門下不
及山僧有送迎

聞思復來歲復館姑孰

久客青山下相思有定蹤感雖傾一飯才豈愧千鍾雪助
看山意春生對酒容官齋倘寥寂書札慰吳儂

青山道中聞稚存已至姑孰

馬頭雲斷處遙見謝家山月色常依舊風流孰與攀故人

枉芳訊今夜隔重關爲爾搖鞭急蒼蒼暮靄閒
南州佳麗地待爾賦新詩相憶魂應斷相逢喜可知雪消
牛渚夕風起鵲磯時自是歸心切非關馬力遲

山行

村雞鳴四野自策蹇驢東怪木常爭路長松獨受風樵歌
生澗底燒氣入雲中回首題詩驛真成雪上鴻

太白樓和稚存

騎鯨客去今有樓酒魂詩魂樓上頭欄杆平落一江水儘
可與君消古憂君將掉頭入東海我亦散髮淩滄洲問何
以故居不適才人自來多失職凡今誰是青蓮才當時詰
屈幾窮哉暮段宗族得死所孤墳三尺埋蒿萊吁嗟我輩

今何爲亦知千古同一坏酒酣月出風起壑浩浩吹得長襟開

以所攜劒贈容甫

匣中魚鱗淬秋水十年仗之走江海塵封繡澀未摩挲一道練光飛不起相逢市上同悲吟今將拂衣歸故林知君憐我重肝膽贈此一片荆軻心

舟泊

江滌莽遼闊暉陰景俄變地冷荒春心霧酸侵酒面破廟雲翻旗空草日移線獨立不見人塵頭野風旋

上朱笥河先生

先生卓然坐虎皮旁羅賓從皆瑰奇珠光劒氣紛陸離貢

之玉堂當世希如余卷曲糲散資不可無一聊備遺公言
我欲拂拭之金沙同治吾能治退而喜也心然疑指胸兀
兀前致詞嗟哉小子幼苦飢典書易米供衰慈草間咄咄
哦惡詩自爲其知曾無師公名束髮心已知三千里外無
見期義興兩龔語我私言公相士無成規掃門求見君無
遲我時唯唯神魂馳聚米不遂徒嗟咨竭來乞食江之湄
頭如蓬葆衣塵緇日日面壁愁孤羈忽聞公至樂不支徑
爾投刺趨堦墀不用溫簡揖路歧豁然霽色雲霧披意氣
傾倒山可移誘我力學言如飴感激真乃零涕洟賓朋暇
日羅盤厄牆頭酒過梁果垂忘情畧分兼娛嬉公也環顧
掀髯髭不惜百妍閒一嫵於時歲景窮崦嵫寒灰忽爾逢

春熙恩遇已極心轉危一身塊然百不宜兩手只解霜整
持漂零落魄志業隳漸恐化雨難爲施他時荆櫟從芟夷
卽是此日牛醫兒雖然一事願脫雖長謝乃敢終其辭假
如公有烟霞思此必弟子相追隨前驅猿猱後麕麋攜囊
入雲採苓芝剝刷幽怪窮險巇佐公巨筆揮淋漓此則不
敢多讓誰公聞此言顧我嘻小子狂矣言無稽言雖無稽
心不欺春葵只有傾陽枝作詩呈公公解頤謂我詩筆猶
可爲十年吟苦霜鬢絲一編吐氣今其時

大雪登清風亭

竹屋風亂鳴青燈黯無色城頭鼓忽沈戶外雪盈尺曳革
來幽亭亭空澹虛白了了見千峯森森動孤魄林暉辨枝

條竹重失蕭緘自來頓袖吟誰尋獨行跡何處無雪看清
境此難覓

桓温墓

虎視中原氣未伸一生功罪總難論錯緣温嶠推英物便
認王敦作可人淚盡金城空感逝歌殘白紵定傷神南州
舊是登臨處廢壠千年草不春

夜雨

瀟瀟冷雨灑輕塵僵臥空齋百感新旱久喜滋栽麥隴泥
深恐阻寄書人希聲或變中宵雪貴價先愁來日薪歲暮
柴門寒較甚可堪此夜倍思親

尋三元洞因登妙遠閣

寒江水落磯痕枯，磯石骨立無寸膚。磴危沙滑不受履，舍
身縫穴千盤紆。倒行蒲伏盡厯級，始見斷壁嵌僧廬。海雲
下棟，猿接臂，河鼓隱竇蛇藏車。最高一閣小於艇，憑欄浩
浩江聲轟采石。上峰翠窈窕，厯陽遠樹烟模糊。魚龍怪氣
走虛壁，水深天闊無象無。晨鐘噪起四山鳥，晚汲唱過西
巖漁。阻風閒有遊客到，惡札疥壁連篇書。或云名山恨僧
占縱，以歸我能畱乎。一身未了地上事，親在詎敢逃空虛。
海門東望白雲盡，獨立縹眇余心孤。等爲過客且休歎，暫
就古佛同跏趺。

筍河先生偕宴太白樓醉中作歌

紅霞一片海上來，照我樓上華筵開。傾觴綠酒忽復盡，樓

中謫仙安在哉謫仙之樓樓百尺筒河夫子文章伯風流
髣髴樓中人千一百年來此客是日江上同雲開天門淡
掃雙蛾眉江從慈母磯邊轉潮到然犀亭下同青山對面
客起舞彼此青蓮一抔土若論七尺歸蓬蒿此樓作客山
是主若論醉月來江濱此樓作主山作賓長星動搖若無
色未必常作人間魂身後蒼涼盡如此俯仰悲歌亦徒爾
杯底空餘今古愁眼前忽盡東南美高會題詩最上頭姓
名未死重山邱請將詩卷擲江水定不與江東向流

虞忠肅祠

氊帳如雲甲光黑飲馬完顏至江北六州連棄兩淮墟半
壁江東死灰色雍公倉卒來犒師零星三五殘兵隨勤王

一呼草閒集督軍不來來亦遲萬八千人同一泣卓然大
陣如山立海陵走死賊臣誅順昌以來無此捷降旗斫倒
十丈長六飛安穩迴建康此時長驅有八可以笏畫地言
琅琅不可與言言不必肯復中原豈今日五路烽煙百戰
平三巴門戶崇朝失卽今青史尙餘悲卽今戰處畱荒祠
寒蘆半沒楊林口白浪猶衝采石磯江淮制置亦人傑下
流觀望何無策再造居然賴此人不是儒生敢輕敵肅爽
鬚眉一代雄誰令遺骨老蠶叢招魂縱有歸來日應在吳
山第一峯

觀瀾亭

岷江出峽連潯陽九派入海爭湯湯陡逢天門怒始激誰

知轉眼仍采石從此濤頭不肯降天縱巉礪與相敵奔騰
萬馬衝復旋采石不改青娟娟崖根有時亦崩剝力鬪畢
竟無兩全有江可憑山可倚天下紛紛乃多事得人守南
岸南人歡呼北人歎所守或匪親北人飛渡南人奔時來
一炬周郎火事去三更擒虎軍誰將地險稱人傑天意茫
茫信難測海潮三日能不來何況區區一拳石時清故壘
半凋殘依舊江聲去不還驚流莫道滄溟近更有金焦兩
點山

辛卯除夕

倏忽流光吹劒過年年此夕費吟哦歷窮詎有繩堪續面
改難如鏡可磨廿載偏憂來日促一身但覺負恩多遙知

慈母尊前意念子今宵定若何

宿黃山下農家夜起偶成

少日嵇康只厭煩每從塵囂戀邱樊三間茅屋終吾事一片嶺雲聞此言夜靜方知山月正心空不礙海潮喧此間卜築眞幽絕何處林泉非故園

雜詩

叔季交道薄所往多干矛原其所自始眞意固不啻鮑叔稱古歡用惠深自售晏仲稱善交敬至情亦浮昔賢固免此學之頽其流何況肉食者此意且未求後門別寒素前門揖貴游前後難俱存終捐舊朋儔撫謙益馨折去已千里修吁嗟世俗交君子以爲羞

古柏行

寓齋數椽畱十日如此稜稜一株柏橫看側看無不奇合
睫相逢夢猶得陰幹澹滲灰星星上枝翠點針矗矗晴穹
浩蕩壓其頂猶自擎空欲騰擲腹中空洞容萬千歲久元
蚺聚成國夜深冷院蕭無人飛起空中鬬雌霓歸來爪牙
青血痕四顧猶攝狐狸魂曉來亦如夢初覺俛見大地盤
其根豈因冰霜始淬厲不待雷雨方精神餘膏尙借百草
活堅節詎恥柔條鄰旁有桑數株傾頽鬢鬢翳荆蔓獨立相看
發長歎淒涼寂寞誰肯過日落空牆與君伴深山大澤斤
斧追重垣綺榭位置卑黃腸裂出鉅鹿野御史府中烏夜
樓彫零一一目所見底用頭角猶低垂蒼官倘見明月夜

密邇客窗來賦詩

贈萬黍維卽送歸陽羨

誰遣依人得得來庾郎家世本崔嵬半生蹭蹬因能達百
樣飄零只助才歌到橫汾聲盡羽飲從河朔氣如雷柳陰
淨洗連錢馬曾踏窮邊雪窖回

語我家山味可誇燕來新筍雨前茶瓣香歲展方回墓畫
舫春尋小杜家北郭買田賒志願南山射虎舊生涯他時
風雪如相訪陽羨溪光似若耶

北里

北里新聲不自愁臨風終日按箏篴等閒一聽征人住白
了江南少婦頭

春日客感

只有鄉心落雁前更無佳興慰華年
人間別是消魂事客裏春非望遠天
久病花辰常聽雨獨行草路自生烟
耳邊隱隱清江漲多少歸人下水船

雜詩

騶駼本野駿萬里流沙來長嘶北風裏
嚼斷黃金枚奈何失所處驅之瘴海隈
炎蒸足溪峒裹身綠烟堆長尾不停
曳草臥蚊如雷南人跨犀象轉鬪聲
轟虺爲君奮馳驟猛獸皆驚摧龍性
豈難變報恩惟盡才落日下西北回
首心餘哀不怨用違地朽骨終就埋
但願埋骨處得近黃金臺隨珠可照
夜胡爲悲暗投干將沒地久光乃燭
斗牛物壽

奇自耀人命憂短修譽聲滿身後不復來山邱誰能抱辛
苦於世眞無求逞美孰能當元文悲處幽見屬或疑布屈
弦反直鉤對之實氣結慷慨不自由及聞大人論外此乃
不憂清明雜夢昧天地賴久留況彼薄俗見汶汶何悠悠

送容甫歸里

經年梗泛判游蹤一笑驚從意外逢甫見投詩辭柳惲反
因墮甌識林宗棲依共作梁間燕磔硤孤生澗底松畢竟
因人非了事誰將雲海盪君胸

羨君樂事故園新問字談經大有人此日衆中推折角他
年殿上待重茵療飢字少憐予陋勸學言溫鑑爾眞自忖
不材終放棄江潭瓠落寄吟身

聚本無端別可驚寄書寄劍是生平以所攜劍贈容甫容甫亦以書寄余今歸
之脫囊生贈吳三尺完璧全歸趙百城酒盡雲山俱黯黯
夜深心燭共明明前途鷗鳥如相訊爲道忘機是舊盟

大雨宿青山僧寺

卽謝公宅

寓樓對茲山了若圖障列誰知一髮絛中有萬盤折冒雨
遊亦佳失聲喚奇絕長嵐互起落陰霾肆生滅蕩魄石氣
腥迎面雲陣裂豈惟咫尺迷收視且不迭惻然念輿夫勞
彼樂我閱身甫轉麓過雨已溼衣澈風澗相喧喧怖畏不
可說失足萬一閒爾我共蹉跌決然舍之行藤蘿奮攀攢
挺險不知勇招提到眼瞥入門一回首此可咋人舌得非
渤澥翻或是瓠子決平鋪黃海雲倒傾太華雪看雨等閒

事此景見眞缺佛樓架山頂黝黑似緇穴壓驚飯宜飽療
衣薪用爇同遊三五人煮茗待我啜雨細聽山溜砢訇變
嗚咽宵夢猶瞿瞿蒼崖恐崩掣勞魂與清氣息息共吁訥
林鳥忽一啼曉鐘鳴漸闌披衣推山窗昨景失如撇萬里
見川原千堆散邱垤山容沐如倦疇色繡疑纈咄嗟轉盼
閒變態何疾烈急作登峰行雜拉步沙屑前嶺獻娟娟後
徑斂清切慨思宣城守茅宇此焉結歡聲寂不聞琴韻杳
以輟空餘一池存周環狀如玦萍色連階苔雨後共淒潔
沈沈選佛場若爲此時設冥心悟流景抗懷緬前哲今昔
且殊情今古詎同轍謝公青雲人尙爾笑其拙我勞復何
爲卽景且怡悅烟中辨長江一氣三屈折漲聲遠可聞練

影細堪掇始知此山高羣峰等棖臬轉思寓樓望長空見
屹嶠風雨爲合離陰晴判藏泄所見皆外境精蘊此深閉
縱有百日畱涉趣詎能竭歸當圖臥遊今方與山別

春暮

江南三月雨零此千花色啼鵲勸人歸啼鶯復畱客歸旣
不得歸畱亦安可畱閒雲及江水浩蕩相與愁春風吹百
草草深沒行路草青客南州草枯在何處人生盡如寄不
如沙上禽更聽隔溪管能傷日暮心

武陵吳翠丞降乩題詩仿其意爲此

憶爲君家婦生年十三五牽裾送君行行爲洛陽賈妾顏
如槿花妾心似荼苦妾夢猶隨南浦雲妾身已化西陵土

西陵松栢同心存同心不移土尙溫昨夜西風動地起搖
動松根驚妾魂君歸不須奠杯酒有酒持歸與歡壽君歸
不須灑清淚灑淚愁澆土花碎自分天長地久心未應拋
擲有如今身不前不識門前路待要尋君何處尋

寫懷示友人

寶馬不戀粟男兒重橫行如何二三子各爲轅下鳴短短
白日影共此萬古情江流不能盡付以深杯傾詞賦奪天
巧讀之人不驚時復仰空廓屹立何崢嶸咫尺天路隔縹
緲望玉京側聞雲中君假我雲車輕騰上無所懷回首惜
令名且揖海上客笑傲爲生平

發蕪湖

纔煮鳩茲市上魚微哦依舊上肩輿偶看芳草思名馬每
見青山想異書古戍按圖三戶後荒祠披版六朝餘野情
更畏勞蹤迫安得前峯便結廬

平岡複疊樹蕭森轉眼長雲度嶺陰詩思折於盤礪路勞
人多似集田禽地曾經戰常難墾山不知名反耐尋舊說
蕪蕪多產處斜陽蔓草自然深

南陵道中

又作輕裝發驚心逝者川殘春辭馬首舊路落愁邊縣古
飛花裏程遙去鳥前還看道旁柳手植已吹棉

水西和對巖韻

白沙羅羅石齒齒涇溪溪水清且駛舒姑泉合麻川來印

文一折三百里此閒水西天下稀複嶂重巖市烟水水邊
古寺何陰森南齊永平構遺址殿腳插入玻璃光鐘聲飄
來翠微裏寺後一池名浴龍風光風光昔遊此老僧一定
垂百年鉢中蜿蜒背人起作帝何似棲禪佳博得長安一
杯耳大中事瑣不足論胡貶才子溫子白龍且有豫且
困洩憤區區無乃鄙遺蹟空指烟霞閒千秋未移雲物美
謝守題詩亦寂寥葛洪丹井荒荆杞神仙富貴兩茫茫惟
有活溪流不死

桃花潭

舊志村人汪倫常藏佳酒待李白白贈之詩

昔人已張錦帆行拋得澄潭徹底清偏是村人能醉客非
關才士易言情抽刀斷水沄沄合蕩槳飛花的的明我有

新詩珍重久只無人送踏歌聲

山行雜詩

輦嶺插天際百折征途艱浮雲向人起蔽此全鄣山耳邊
水聲急激澗流無還千丈瞰深黑去我咫尺閒失足豈可
道慎矣方躋攀

飛梁度嶰壑岐陀漸修曼連峰互暉陰觸目情態換登頓
已云疲腹飢亦思飯誰知山徑長去路甫過半四顧無一
人山頭日將旰

道旁見樵衣疑是虎啖餘側身望中嶺半黍形蠕蠕須與
負薪至低唱過我車爲言山貓多危語訝僕夫語罷入林
去頃使余心孤

行行度深樾自顧不見影一風吹我衣百體共淒警平生
輕路心內反猶耿耿虛氣一相乘壯志不可騁論事貴及
身此理庶堪省

疊嶂忽中豁杈枒見山城是時及晚爨一片烟漫青頓與
人氣接往恐倏忽平我馬何厖厖叱馭驅速行長坡落浩
蕩回首無畱情

重至新安雜感

舊地重過思不禁匆匆人事感消沈昔遊城郭都如夢
句溪山待更尋林鳥尙窺前度客嶺雲能識再來心黃鬚
老子應無恙可許談詩坐漏深

謂曹以南

六六青峰卷幔收當時因病滯冥搜山靈重與開生面瘡

鬼何能阻再遊舊物尙餘雙蠟屐此身無恙一扁舟只愁

明日丹臺訪相見軒皇也白頭

己丑欲遊黃山病瘡不果

司馬清狂賓從賢一時文譙極流連新符已綰鄱陽守舊館誰開北海筵到日仍看門似市箇中曾坐夜如年樓臺

易主人非昔燕子生涯絕可憐

謂王敬亭司馬

五載營巢苦未安此心常似越梅酸漁樵舊侶猶相訊猿鶴深盟忍遽寒見長僧雖能說法自裁堤柳已垂欄依然著白隨行路漸有兒童冷眼看

兩當軒集卷第四